

MAULID RASUL

29 SEPTEMBER 2023 | 13 RABIULAWAL 1445H

الْحَمْدُ لِلَّهِ مُحَمَّدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا
عَبْدُهُ وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita meningkatkan ketakwaan kepada Allah dengan mengerjakan suruhan-Nya dan meninggalkan larangan-Nya. Mudah-mudahan kita mendapat keredhaan Allah di dunia dan di akhirat

Sidang Jumaat yang dirahmati Allah Subhanahu wa Ta'ala,

12 Rabi' al-Awwal merupakan satu tarikh yang besar kepada umat Islam kerana mereka akan mengingati peristiwa Maulid Rasul Sallallahu Alaihi Wasallam. Umat Islam menzahirkan rasa syukur dengan kelahiran insan agung yang mulia ini yang menjadi penyambung risalah Allah kepada manusia. Cinta kepada baginda telah pun mengalir dalam diri setiap umatnya sehingga membuatkan kekasih Allah ini terlalu istimewa untuk kita semua.

Kelahiran baginda adalah rahmat kepada alam ini. Allah Subhanahu wa Ta'ala berfirman dalam surah al-Anbiya ayat 107:

أَعُوذُ بِاللَّهِ مِنَ الشَّيْطَانِ الرَّجِيمِ
وَمَا أَرْسَلْنَاكَ إِلَّا رَحْمَةً لِّلْعَالَمِينَ

Yang bermaksud: *“Tidaklah Kami utuskan engkau (wahai Muhammad) melainkan sebagai rahmat kepada seluruh alam.”*

Kita menyambut Maulid ar-Rasul ini adalah tanda syukur kepada Allah Subhanahu wa Ta'ala kerana Rasulullah Sallallahu Alaihi Wasallam telah mengorbankan segala-galanya untuk menyelamatkan umatnya daripada menyembah makhluk kepada menyembah Allah Subhanahu wa Ta'ala.

Mengeluarkan mereka daripada kehidupan yang penuh dengan kezaliman dan maksiat kepada sifat-sifat mulia. Tidak dapat kita bayangkan bagaimana kehidupan kita hari ini tanpa pertunjuk Baginda, sudah pasti kita hidup dalam kesesatan dengan tidak menyembah Allah Subhanahu wa Ta'ala dan bergelumang dengan maksiat dan dosa. Oleh itu, sambutan Maulid ar-Rasul ini akan menambahkan rasa cinta kita kepada Rasulullah Sallallahu Alaihi Wasallam. Ingatlah mencintai Rasulullah lebih daripada segala-galanya adalah salah satu kewajipan setiap muslim. Sebagaimana sabda Baginda Sallallahu Alaihi Wasallam dalam hadis riwayat Imam al-Bukhari:

لَا يُؤْمِنُ أَحَدُكُمْ، حَتَّىٰ أَكُونَ أَحَبَّ إِلَيْهِ مِنْ وَالِدِهِ وَوَلَدِهِ وَالنَّاسِ أَجْمَعِينَ

Yang bermaksud: *“Tidak sempurna iman seseorang daripada kamu sehingga aku lebih dicintainya daripada bapanya dan anaknya serta manusia keseluruhannya.”*

Sidang Jumaat yang dirahmati Allah Subhanahu wa Ta'ala

Cinta kepada Baginda bukan hanya perkataan yang dilafazkan, ia perlu dibuktikan melalui amalan. Bagi membuktikan cinta tersebut kita hendaklah melakukan amalan-amalan yang menjadikan kita semua dekat dengan Allah Subhanahu wa Ta'ala dan Nabi Muhammad Sallallahu Alaihi Wasallam. Oleh itu hendaklah kita membanyakkan selawat kepada Baginda sebagaimana hadis riwayat al-Nasaie:

مَنْ صَلَّى عَلَيَّ صَلَاةً وَاحِدَةً صَلَّى اللَّهُ عَلَيْهِ عَشْرَ صَلَوَاتٍ،
وَحُطَّتْ عَنْهُ عَشْرُ خَطِيئَاتٍ، وَرُفِعَتْ لَهُ عَشْرُ دَرَجَاتٍ

Yang bermaksud: *“Sesiapa yang mengucapkan selawat kepadaku satu kali maka Allah akan berselawat baginya sepuluh kali, dan digugurkan sepuluh kesalahan (dosa)nya, serta ditinggikan baginya sepuluh darjat (di syurga kelak).”*

Sidang Jumaat yang dirahmati Allah Subhanahu wa Ta'ala,

Sebagai tanda cinta kepada Baginda, hendaklah kita mengamalkan sunnah-sunnah Nabi Sallallahu Alaihi Wasallam sebagaimana yang dilakukan oleh para sahabat Baginda.

Antaranya ialah, mendirikan solat lima waktu secara berjemaah. Oleh itu jika kita meninggalkan solat lima waktu secara berjemaah, menyebabkan kita jauh daripada petunjuk dan keberkatan Allah Subhanahu wa Ta'ala. Hayatilah kata-kata Ibnu Masud yang

mengingatkan kita tentang kepentingan sunnah solat berjemaah di masjid, Beliau berkata:

Yang bermaksud: *“Jika kamu meninggalkan sunnah Nabi kamu ini (iaitu solat berjemaah di masjid) kamu pasti akan sesat “*

Hari ini kita melihat perpecahan yang amat ketara dalam masyarakat Islam. Mengapa ini berlaku jawabnya kerana sunnah Nabi ini telah ditinggalkan. Salah satu daripada sunnah Rasulullah bagi menyatukan umat Islam ini antaranya bermula dengan solat berjemaah. Maka dengan itu, berpeganglah dengan al-Quran dan sunnah Rasulullah Sallallahu Alaihi Wasallam supaya kita selamat daripada kesesatan. Sebagaimana sabda Rasulullah Sallallahu Alaihi Wasallam dalam hadis riwayat Al-Tirmizi:

Yang bermaksud: *“Dan sesungguhnya, barang siapa di antara kamu yang akan hidup sepeninggalanku akan mendapati perselisihan yang banyak, maka berpeganglah dengan sunnahku dan sunnah Khulafa' Rasyidin yang telah mendapat petunjuk, peganglah sunnah tersebut dengan sekuat-kuatnya.”*

أَعُوذُ بِاللَّهِ مِنَ الشَّيْطَانِ الرَّجِيمِ
فَلْيَحْذَرِ الَّذِينَ يُخَالِفُونَ عَنْ أَمْرِهِ أَنْ تُصِيبَهُمْ فِتْنَةٌ أَوْ يُصِيبَهُمْ عَذَابٌ أَلِيمٌ

Yang bermaksud : *“Oleh itu, hendaklah mereka yang mengingkari perintahnya, beringat serta berjaga-jaga jangan mereka ditimpa bala bencana, atau ditimpa azab seksa yang tidak terperi sakitnya”*

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنْ
الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ
هُوَ الْغَفُورُ الرَّحِيمُ.